

07.02.2017.

ZAPOČETA 3. TEMATSKA SJEDNICA SKUPŠTINE BPK-A GORAŽDE Plan mjera za unaprjeđenje stanja u oblasti zdravstva na području BPK-a Goražde bit će usvojen na nastavku sjednice



Skupština Bosansko-podrinjskog kantona Goražde danas je započela svoju treću tematsku sjednicu posvećenu zdravstvu na području BPK-a Goražde.

Sjednici su, uz poslanike i članove Vlade BPK-a Goražde, prisustvovali i predstavnici menadžmenta zdravstvenih ustanova i Sindikata zdravstvenih radnika BPK-a, Udruženja poslodavaca BPK-a, te predstavnici slovačkog LOT tima EUFOR-a i CCI-a BiH.

Prije početka rasprave, Skupština se izjasnila i nije prihvatila prijedlog poslanika Emira Frašta (SDP) da se današnja sjednica odgodi.

Uvodno obrazloženje, u okviru kojeg je predstavio Informaciju o stanju u oblasti zdravstva na području BPK-a Goražde, dao je ministar za socijalnu politiku, zdravstvo, raseljena lica i izbjeglice Damir Dučić.

U svom izlaganju resorni ministar osvrnuo se na način funkcionisanja primarne i sekundarne zdravstvene zaštite u BPK Goražde, potrebe zdravstvenih ustanova, te probleme u njihovom radu.



Kao ključni problemi istaknuti su finansijska nelikvidnost zdravstvenih ustanova prouzrokovana

nedovoljnim prihodima, nedostatak kadrova i opreme, veliki troškovi liječenja van kantona i Liste esencijalnih lijekova, neracionalnost ukupnih troškova u zdravstvu i nedovoljan angažman rukovodnih struktura u zdravstvu na njihovoj racionalizaciji, te korupcija u zdravstvenom sektoru, koja je, kako je istaknuto, motivisana različitim faktorima.

S tim u vezi, resorni ministar je predstavio i preporuke Ministarstva za socijalnu politiku, zdravstvo, raseljena lica i izbjeglice za unaprjeđenje trenutnog stanja u zdravstvu, koje bi bile realizovane kroz provedbu zaključaka Skupštine.

Također, predsjednik Komisije za rad, zdravstvenu i socijalnu zaštitu Skupštine BPK-a Goražde Senad Čeljo upoznao je Skupštinu sa prijedlozima mjera za poboljšanje postojećeg stanja u zdravstvu koje je utvrdila ova Komisija.

Na sjednici je predstavljen i prijedlog mjera za unaprjeđenje situacije u zdravstvu Kluba SDA koji je predstavila predsjednica Kluba Alma Delizaimović.

U diskusiji na jednici, osim poslanika, učestvovali su i predstavnici menadžmenta zdravstvenih ustanova, te predstavnici Sindikata i zdravstvenih radnika koji su pozdravili održavanje današnje sjednice i izrazili spremnost da se zajedno sa drugim relevantnim sudionicima uključe u definisanje i provođenje mjera koje imaju za cilj rješavanje nagomilanih problema u zdravstvu.

